

Protestan polo despido  
contra a banca e a patronal  
rexeitan a tiranía  
que impón o capital.

Anda a xente indignada  
coa auga ao pescozo  
con tanto pago pendente  
hanse afogar no pozo.

A salvación desta crise  
vén dos grandes empresarios  
despiden traballadores  
e a facerse millonarios.

Esixentes son os amos,  
pero máis cando os servimos  
por moito que traballemos  
sempre pensan que durmimos.

Díxolle unha muller a outra  
polo burato da porta  
os ricos rouban aos pobres  
e aos que mandan non lle importa.

Para mostra un botón  
EREs, Gürtel ou Campián  
hai corruptela dabondo  
pero máis na construción.

Tres anos vive un furón  
tres furóns vive un can  
algúns políticos viven  
do que os amigos lle dan.

Novagalicia é un banco  
que engana á clientela  
deixou a moitos galegos  
máis tesos que unha vela.

Abusou da confianza  
para pillarlle o aforro  
agora que o precisan  
teñen que pedir socorro.

Camiñando polo río  
vimos lixo a mogollón  
a limpeza polo Gafos  
aínda non ten solución.

Temos pancarta no cole  
falando de educación  
púxose antes da Pascua  
coa santa bendición.

A realeza é noticia  
a prensa non dá falado  
desde o neto ata o Rei  
con Iñaki de imputado.

Manda truco, mando truco,  
o que temos nas poltronas  
cazadores, carteiristas  
con infantas xoguetonas.

Aínda ten moitos complexos  
o galego na cidade  
non se fala nas escolas  
temos pouca dignidade.

O galego nosa Lingua  
outra vez abandonada  
se queremos que perviva  
todos debemos falala.

Ser galego é moi grande,  
ser pontevedrés xenial,  
os nados na boa vila  
son dunha graza especial.

Para a luz a deste día  
para sombras o carballo  
para dar a despedida  
esta copla de agasallo.

Aquí vai a derradeira  
xa nos temos que marchar  
agardamos que a crise  
non nos faga emigrar.

# MAIO

## C.E.I.P. CAMPOLONGO



# ANO 2012

Un canto roxo no vento  
beixa o azul de mediodía  
son coplas de Campolongo  
que estalan na Ferraría.

Vimos ledos a esta praza  
para cantarlles o Maio  
cada verso unha benvida  
cada estrofa un regalo.

Traemos letriñas novas  
coas as palabras da escola  
se vos gusta o que dicimos  
botádenos unha esmola.

Moita falta nos fará  
pois andamos apertados  
coas medidas de axuste  
rematamos abafados.

Veñen tempos de carencias  
todo semella esfolado  
as novas que escoitamos  
déixannos moi amolados.

Chega o Maio a Pontevedra  
cargadiño de ledicia  
os paus xa resoan forte  
polas prazas de Galicia.

Moito traballo levamos  
para vir a Ferraría  
bulindo dun lado a outro  
pola noite e polo día.

Flores fiúncho e pampullos  
non os demos atopado  
coa seca que nos toca  
só agroman os parados.

O maio da nosa escola  
ten laranxas un millar  
tamén ten uns cantos ovos  
que non son para tirar.

Volven agromar as flores  
nos verdes eidos galegos  
na primavera acendida  
óense cantar os merlos.

Cada ano fanse obras  
porque aumenta o alumnado  
ao colexio Campolongo  
chámanlle o remendado.

Os veciños desta vila  
non están todos a gusto  
teñen prazas, teñen pontes  
pero sóbenlle o tributo.

Miguel Anxo e mais Louro  
forman parella de mando  
non se oe a oposición  
aínda seguen remando.

Telmo foi para Madrid  
con promesas na mochila  
que conto nos traerá  
cando volva pola vila.

Moreira colle o relevo  
para ordenar o poleiro  
mentres desgasta a Lores  
cos asuntos do diñeiro.

Entre outros obxectivos  
o dos cartos é importante  
se non hai investimento  
as obras non van adiante.

Miguel Anxo anda molesto  
polo tema cultural  
non lle gustou que Louzán  
suprimira a Bienal.

Gerardo Conde “o breve”  
mandatario en Santiago  
tantos anos dando caña  
pra rematar imputado.

Entrou con moita soberbia  
ocultando aos cidadáns  
que tiña contas pendentes  
agochadas entre as mans.

A Xunta que nos dirixe  
perde co paso do tempo  
co goberno de Galicia  
aumenta o descontento.

Aeroportos sen avións  
mausoleos no Gaiás  
os cartos non dan chegado  
para tanto paspallás.

Ante este desconcerto  
pra contentar aos galegos  
Feijóo propón o milagre  
ofrecendo un plan de emprego.

Para atraer o voto  
fai uso da oratoria  
despois que o ten no peto  
non logra facer memoria.

Se hai que apertar o cinto  
vaille tocar aos de sempre  
para financiar servizos  
pidenlle esforzos á xente.

Pachi Vázquez onde andas  
pouco se sabe de ti  
se queres ser presidente  
ensaia o DO-RE-MI.

Coa muda de goberno  
chegou o cambio esperado  
sobe o paro e os impostos  
e Rajoy segue calado.

Ata o vinte de novembro  
todo era anunciar  
agora que xa goberna  
dĩ que compre recortar.

Desde Europa tocan solfa  
para que sexa guiado  
e el presume de mando  
co país hipotecado.

Rubalcaba non remonta  
a perda de confianza  
ten unha lousa enriba  
cando lle lembran a herdanza.

Dirixentes da tesoiria  
e da cultura do medo  
baixo o paraugas do voto  
mandan á xente ao inferno.

Recortan na educación  
para poder aforrar  
non importa a calidade  
nin o fracaso escolar.

Máis horario de presenza  
máis alumnado nas clases  
farán pastores aos mestres  
e rabaños aos rapaces.

A sanidade de balde  
queren quitala do medio  
se prohiben enfermarse  
venlle do ceo o remedio.

Que non vos atente o demo  
ir pola quenda de urxencia  
se vos atopades mal  
botade man da carteira.

Deste xeito de seguro  
que o negocio funciona  
o que non paga que aguante  
quen ten cartos soluciona.

O vinte e nove de marzo  
houbo unha folga xeral  
moita xente non acepta  
a reforma laboral.